

COLOSENSES

Pëpayë

1 ¹Yë'ë Pablopì Maija'quë yëyepì Jesucristo jëjo saokuë de'osiquëpi, Maija'quë do'iquë Timoteo ja're cõni, ²iyë toya ja'hua Cristore asa do'ire Maija'quë do'ijëpi Colosas daripë pa'icohua'ina, Maija'quë tsecohua'ina sehuosicohua'ina cajë toyayë. Maija'quë mësarute oi ì coa isiyepì jo'cua de'oye pa'ijë'ë.

Sehuosicohua'ire Pablo Sëcacaiye

³Si'anë mësaruni cajë sëcacaiyë, Maija'quëna, Jesucristo pëca ja'quëna de'oji cajë. ⁴Mësarù Jesucristore pa'ire paji cuasajë pa'icohua'ipi. Si'aohua'ire Maija'quë tsecohua'ire oijë pa'iyere quëajëna, asa do'ire pajë sëñë. ⁵Jaje mësarù cato yo'oyë, mësarute caquë de'huacaise'e ma'tëmöre pa'iji cajë ute do'ipi. Iye uteye mësarù ti'ahuë, nuñerepa huaso cocare quëajëna, asasi do'ipi. ⁶Mësarute quëajëna, asasi cocapi ai de'oco si'a hue'ña quëiona, tëayë. Mësarù Maija'quë oiyere asani iye oiye nuñere pa'ë cajë asasi maca mësarute yo'ose'ejë pa'ye yequë pairejë yo'oji. ⁷Iye cocare pare mësarute yëquë oiquë Epafraspi ye'yapi, yëquë ja're co'amaña nesiquëpi cui'ne mësarù Cristore necaiquëre pare ñaquëpi. ⁸Ja'ëpi dani yëquëre quëapi, mësarù pa'iyë cui'ne mësarù joñoapi sa'ñe oijë pa'iyere.

⁹Mësarù pa'iyë quëajëna, asasi maca acohua'ipi, mësarute jëoma'pë Maija'quëre sëcacaiyë, ipi si'aye ì yëye, joyo pa'iyë ta'ñe asaye isiquëna asajë pa'ijajë cajë. ¹⁰Jaje asa ti'acohua'ì pa'ijë yureta'a si'aye de'o co'amañase'e quëiñeje pa'ye yo'ojë, Èjaë tsecohua'ì sëtë ì sihuaquë ñañere yo'ojë, cui'ne ai jerepa Maija'quë pa'iyere asa ti'ajë pa'ijë'ë cajë. ¹¹Jaje pa'ina, cui'ne sëñë, ìte, mësarute ì de'o tuture papi tutu quë'iohua'ire necaijaquë cajë. Jaje necaina, tutu ìsi cuañosicohua'ì pa'ijë, yo'o jujaye peoyerepa dahuëre yo'ojë sihuajë si'aye quëco ti'ajajë cajë. ¹²Jaje quëco ti'acohua'ì pa'ijë yureta'a Maija'quëre sihuajë pëpaja'cohua'ì a'ë, ì tsecohua'ire ìsi co'amaña ayere cõni mia hue'ñare pana paja'cohua'ire ne de'huasiquëre. ¹³⁻¹⁴Maija'quëpi maire, nea hue'ñapi jo'yaohua'ire pacohua'ini etoni mai tayose'ere tsie do'ipi sai de'huacani ì oiquërepa ì mamaquë cuãne te'tena ñopi.

Cristo Jucacaisi Do'ipi, Maija'quë Cajeohua'i Pa'iyë

¹⁵Maija'quë ña cuañoma'quëpi ì mamaquëja'a tĩña ña cuañoquë daji'i. Ì mamaquë cato si'aye peo'në aquëre papi. ¹⁶Jaë ja're cõni Maija'quë si'aye iye yeja pa'iyë cui'ne ma'tëmo pa'iyë de'huapi, mai ña ti'a ma'ñe, cui'ne mai ñañe de'huapi. Jaje cui'ne si'aye cuañeñere, meñe cuañe tutu payere, ëjaë pa'iyere, jo'ya ne tutu payere Cristo ja're cõni de'huapi, ì tse pa'i ja'ñere. ¹⁷Jaje pa'ina, Cristo cato si'a co'amaña peo'në du'ru pa'isiquë api. Jaje pa'ipi ipi ñacaina, ì tutupi si'aye de'oye iti pa'i macare pa'iji. ¹⁸Cui'ne yequeje Cristo cato sehuosicohua'i siopë api. Jaje pa'ina, sehuosicohua'ire pa'iyë isiquëpi du'ru pa'iquëre papi si'aye du'ruja'a pasi'i caquë ju'iñeje juni huëji'i. ¹⁹Jaje pa'ina, Maija'quëpi sihuapi, si'aye ì pa'iyepi Cristore pa'ina. ²⁰Jaje pa'ina, Maija'quë Cristo do'ija'a si'a iye yeja pa'icohua'ire cajeohua'i de'osi'i cuasapi, ma'tëmo acohua'ijë pa'iohua'ire, cuasaquë Cristo cruz ju'i do'ija'a cajeohua'ire de'huapi.

²¹Ja'në mësarü joñoapi co'aye cuasajë yo'o do'ire Maija'quë sañope yo'ocohua'ipi tìohua'i paë'ë, pa'isicohua'ipi. Yure cato Maija'quë cajeohua'i de'ohuë, ²²Cristo ai yo'oquë jucacaisi do'ipi. Iye cato yo'opi mësarupi ì ña huë'ñare pana ìna isicohua'ipi ti si'si te'ña peocohua'ipi pa'ijëna, pasi'i caquë. ²³Ja ñaquë payere ti'añere cajë mai utejë pa'iyere, huaso coca mësarü asase'ere ti hua saima'pë, Maija'quë pa'ire paji cuasayere ocue pa'i macarepa cuasajë tuiye pa'iji. Iye cocare si'a huë'ña quëacaiyë, yë'ë Pablojë jare quëacaiquë pa'iyë.

Pablo Sehuosicohua'ire Necaiye

²⁴Cristo ì capë acohua'ire oi ai yo'ose'e carayere, yë'ë capëpi mësaruni caquë ai yo'oquë ne saocai yure cato ai sihuayë. ²⁵Jaje pa'ina, Maija'quëpi yë'ëre sehuosicohua'ire necaija'quëre nepi. Neina, ì cuañe nëose'eje pa'ye mësarü de'oye pa'i ja'ñere caquë si'aye ì coca quëacaiquë pa'iyë. ²⁶Jaje pa'ina, tsoe huë'ña ometëcana yahuese'e pai asa ma'ñe pa'ise'ere yureta'a ì tsecohua'ina iñose'ere jare quëayë. ²⁷Maija'quëpi yë judío pai peocohua'ina, iye pai asa ma'ñe yahuese'ere de'oyere pare iñoopi. Ja cato Cristopi mësaruni pa'iyë a'ë. Jaë api, mësarü utejë pa'iquë de'oquërepa.

²⁸Yëquëpi Cristo ayere quëayë. Si'ahua'ire de'oyerepa asa tì'ajajë cajë ye'yajë cui'ne yëhuoyë. Jaje yo'ojëna, Cristona tsiosicohua'ipi de'oyerepa pai ñape ai de'osicohua'i pa'ijajë cajë. ²⁹Jare caquë yë'ë, si'a tuturepa yo'oquë neñë, Cristo cuañe tutu yë'ëre isiyepi.

2 ¹Yë'ë cato yëyë, mësarupi yë'ë mësarute caquë jëayerepa yo'oyere cui'ne Laodicea acohua'ire caquë yo'oyere cui'ne si'ahua'ire yë'ëre ñama'cohua'ire caquë yo'oyere asayere. ²Jaje pa'ina, mësarupi cui'ne jaohua'ipi cõni joñoa quëcoyere pajajë caquë yo'oyë, sa'ñe oiyena tsiosicohua'ipi pa'iji cuasacohua'ipi. Diosu pa'iyë cui'ne Jesucristo pa'iyë yahuese'ere asa tì'ajajë caquë yo'oyë. ³Jaë api, si'aye ta'ñe cuasaye, cui'ne

asa tì'añe paquërepa. ⁴Jaje cayë, mësarute, asa ëaye ta'ñe ca cocapi yecohua'ijë cosojë nema'pë pa'ijajë caquë. ⁵Jaje pa'ina, yë'ëpi mësaru ja're çoni pa'ima'ë panije, mësaru ja're çoni pa'iyë, yë'ë joyopi. Jaje pa'ina, sihuaquë ñañë, mësaru, cui'na hue'ña yo'oma'pë pa'iyena Cristo pa'iji cuasayere ocue pa'i macarepa pa'iyere.

Cristo Ja're Huajë Pa'iyë

⁶Ëjaë Jesucristore mësaru yëjë pa'iji cuasajë sehuose'ejë pa'ye cui'ne ina tsiosicohua'ipi pa'iji cuasajë pa'ijë'ë. ⁷Ina jëayerëpa, pa'ire paji cuasayepi tsita mesicohua'ipi ocue pa'i macarepa i ja're pa'ijë'ë. Mësaru ye'yese'ejë pa'ye Maija'quëre si'anë de'oji cajë pëpajë pa'ijë'ë.

⁸De'hua ñajë'ë, yo'ojë jo'ya ne cuañoñe, aïohua'i ye'yase'ena, pa'i cuasayena, iye yeja pa'i yo'oyena. Ja cato cosoye a'ë, cui'ne do'i peoye a'ë. Ja cato Cristo yo'o ma'ñe a'ë.

⁹Ñajë'ë, si'aye, Maija'quë ayepi Cristoni pa'iji. ¹⁰Jaje pa'ina, mësaru Maija'quë pa'iyepi timësicohua'i carajaima'cohua'ipi pa'iyë, Cristona tsioni pa'i do'ire. Jaë cato si'aye mëñe Ëjaë api. Cui'ne si'aye mëñe cuañequë api. ¹¹Cui'ne i ja're mësaru tsioni pa'i do'ire, noni tsì'nëna co'acohua'i pa'iyere huaso cuañoñuë, cui'ri ca'ni tëayeje pa'ye mësarute yo'oquëna. Pai jëñapi capëna tëayeje pa'yepi neñe papi, mësarute. ¹²Cui'ne mësarupi Maija'quë tutupi ju'lisiquëre huëopi cuasajë sehua do'ire mësaru oco do cuaño maca Cristo ja're ta cuañoñuë. Ta cuañosicohua'ipi cui'ne i ja're çoni huëo cuañoñuë, ju'lisicohua'ipi. ¹³Ja'në mësaru tayo yo'ocohua'ipi, cui'ne ca'ni tëa cuañoñoma'cohua'ipi joñoa ju'lisicohua'i paë'ë. Pa'ijëna, Maija'quëpi Cristo do'ija'a mësarute i ja're çoni pa'iyë necaji'i. Necai si'aye tayo yo'ose'ere sai de'huacaji'i, Cristo do'ipi. ¹⁴Mai co'aye yo'o do'ire, jare maipi sañe pa'ise'ere Maija'quëpi cruzuna que jeopi, maire sañope toya nëose'ere peo hue'ñarepa nejoquë. ¹⁵Jaje yo'oquë Cristo cruzna ju'ise'epi si'aye ëja pa'ise'ere cui'ne maire meñe cuañecohua'i tutu pa'ise'ere meñe quëco huesëpi, si'ahua'i ña hue'ñare pana.

Ma'tëmo Co'amañare Co'ejë'të

¹⁶Jaje pa'iyë sëtë yecohua'ijë mësarute nuñe yo'oma'cohua'i a'ë, cama'pë pa'ijajë mësaru aiñere, panita'a ucuyere panita'a fiesta mu'señare, ñañëja'a së'ayere, panita'a pëa huajë mu'se ayere. ¹⁷Si'aye iye cato, itirepa dai ja'ñe pa'ina, pa'i to'ouje pa'ye a'ë. Ja itirepa cato Cristo a'ë. ¹⁸Jaje pa'ina, de'hua ñajë'ë, mësarute isija'a co'amañare nejocaijë teaye pa'iohua'i ña cuañocohua'ipi cui'ne huññaohua'ire secohua'ipi, mësarupi iohua'i yo'oyena ñajë sehuojëna. Jaohua'i cato ti iohua'ijë ña ma'ñere cui'ne pa'ise'e huëojë cuasayere yëcohua'i a'ë, jerepa pa'iohua'i a'ë cuasacohua'ipi. ¹⁹Jaohua'i cato Maija'quë cuasa nëose'ejë pa'ye yo'oquë pai ñape te'ña te'e capëna tsioquë, a'quë ai de'huaquë Cristona, iti siopëna tsioma'cohua'ipi yo'oyë.

²⁰Mësaru Cristo ja're ju'isicohua'i a'ë. Jaje pa'ina, iye yeja cuañe tutupi cuañequëna, pa'iye pañë, mësaru. ¿Jaje pa'quëta'are mësaru me yo'ojë ja yë'ta'a iye yeja pai yo'ojë pa'iye pa'ijë, ²¹iye yo'oma'pë, aïne pajë'ë, iye, cui'ne iyere tseama'ë, mël'ë jëtëpi caye'ni? ²²Si'aye jaje caye cato, pai cuañejë ye'yaye a'ë, si'aye ja co'amaña cato iti yo'o macana cara ja'ne a'ë. ²³Nuñerepa cayë, ja teaye pa'iohua'i pa'ijë cui'ne capë ai jëaye cuañejë yo'oye ai ta'ne yo'oyerepa ña cuañoji, Maija'quëre ti'añu'u cajë yo'oye. Jaje pa'iquëta'are mai capë yëyere sañope yo'oyere cocai ma'ne a'ë.

3 ¹Mësaru Cristo ja're huëisicohua'i sête ma'tëmo co'amañare co'ejë'ë, Maija'quë ëja t'ëhuire Cristo ñu'i hue'ña ayere. ²Ma'tëmo ayere ai yëjë pa'ijë'ë, iye yeja co'amañare cuasama'pë. ³Mësaru cato, tsoe Cristo ja're conì ju'isicohua'i a'ë. Jaje pa'ina, mësaru pa'iye yure Cristo ja're Maija'quëna yahuese'epi pa'iji. ⁴Jaje pa'ina, Cristo mësaru pa'iyepi ñai co maca mësaruje ì de'oyere pare timësicohua'ipi ñaija'cohua'i a'ë, ì ja're conì.

Tsoe Pa'iye Cui'ne Huajëye Pa'iye

⁵Jaje pa'iye sête si'aye mësaru iye yeja aye yëyere ne huea saojë'ë: yequë nomiore, panita'a yequë ëmëre yo'oyere, ëa ña huesëyere, si'sire yëyere, co'amaña ai tsi'so timëne cuasayere. Ja cato de'huasi diisure señeje pa'ye a'ë. ⁶Jaje yo'ocohua'ire Maija'quë pëi nejoñepi daija'coa, ìte de'oye sehuocaima'cohua'ire.

⁷Ja'në mësaruje jare yo'ojë pa'ahuë'ë. ⁸Jaje pa'iquëta'are yure mësarupi si'aye iyere jecojë'ë, pëtire, ëa ña huesëyere, co'ayere yecohua'ire tea ju'ijë tutu cayere, cui'ne mësaru yë'opopi si'si coca cayere. ⁹Ja'në pa'ise'ere jecocohua'i sête, yure yecohua'ire cosoye pajë'ë. ¹⁰Huajë pa'iyena, suñasicohua'ire ja pa'iyepi si'a mu'señapi ponaquë saiji, maire de'huasiquëje pa'iohua'i pa'iyena ìte de'oyerepa asa ti'a macaja'a, yo'o tëjiyere caquë.

¹¹Jaje pa'ina, huajë pa'iye pacohua'ire cato peoji, griego pai a'ë, judío pai a'ë, caye peoyë, ca'ni tēcohua'i, tēama'cohua'i, jo'yaohua'i cui'ne jo'ya ne cuañoma'cohua'i. Coa si'a pai te'e pai pa'iyë, Cristo tsecohua'i, ìpi si'aohua'ire pa'i do'ire. ¹²Maija'quëpi mësarute ai oi sahuani ì pai pa'ijajë caquë soipi. Jaje pa'iye sête paire teaye ñani oiyena, de'oye necaiyere pana, ai jerepa pa'iyë cuasama'cohua'i pa'iyena, a'jicohua'i pa'iyena, cui'ne yo'o jujama'cohua'i pa'iyena, suñasicohua'irepa pa'ijë'ë. ¹³Co'aji, quëco jujahuë caye peoyerepa. Sa'ne de'oye yo'ojë pa'ijë'ë. Cajeipi sañope yo'ose'le paquë pa'lito, ì co'aye yo'ose'ere oni yejeje'ë, Èjaërepa mësarute oi sai de'huacaise'ejë pa'ye. ¹⁴Paire oiyena suñasicohua'irepa pa'ijë'ë, ja oiyepi de'oyerepa. Te'ijë pa'iohua'i tsioni pa'iye pa'iji. ¹⁵Jaje pa'ina, mësarute, Maija'quë jo'cua de'oye pa'iyepi, mësaru joña de'oye cuajaquë caquë Maija'quëpi soini te'e capë acohua'ire nepi. Jare de'oji cajë pëpajë pa'ijë'ë.

¹⁶Jaje pa'ina, si'anë Cristo cocapi mësaru jayo timëse'erepa pa'ijaquë. Pa'ina, yecohua'ire ye'yajë cui'ne yëhuojë'ë, ta'ne pa'i cocare papi.

Mëсарu joyore papi i necaise'ere pëpajë sihuajë jëjëjë'ë, tsoe toyase'epi, yure toyase'epi cui'ne joyo etayepi. ¹⁷Cui'ne coa si'aye mëсарu caye pаnita'a yo'oye pa'ito, mai Èjaë Jesucristore necaiyë cuasajë Jesús do'ija'a Maija'quëre de'oji cajë pëpajë'ë.

Huejasicohua'i Pa'iyе

¹⁸Nëjohua'i mëсарu ëjëohua'ire ëjaohua'ire cuasajë de'oye yo'ojë pa'ijë'ë, ja'ë, Cristore sehuosi nomiohua'i yo'ojë pa'iyе. ¹⁹Cui'ne mëсарu ëjëohua'ijë mëсарu nëjohua'ire oijë pajë'ë, co'arepa jëaye tutu caye peoyerepa. ²⁰Mamajë mëсарujë si'aye mëсарu ja'quëohua'i caye de'oye sehuocaijë'ë, ja'ë, Maija'quë sihuaquë ña'ne. ²¹Ja'quëohua'i mëсарujë mëсарu mamajëre de'oye oijë ye'yajë'ë, jerepa de'oye yo'oye yëja'cohua'ire, tea ju'iñeje yo'ojëna, co'a de'ojë. ²²Èjaohua'ire pacohua'i, jo'yaohua'i maña mëсарujë mëсарu ëjaohua'ire de'oye sehuocaijë nejë'ë. Iohua'i ña macase'lohua'ini de'oye iñoñu'u cajë yo'oma'pë. Coa ai jerepa nuñerepa cuasa joyopi ëjaëre pare pa do'ire yo'ojë'ë. ²³Jaje pa'ina, pаini necaiyë cuasaye peoyerepa co'amaña nejë'ë sihuajë, Èjaë Jesure necaiyeje pa'ye cuasajë. ²⁴Jaje pa'ina, mëсарu nuñerepa Èjaëni Cristore necaisi do'ire, i mëсарute i paye ayere isija'quë api, nesi do'ire. Jare mëсарu tsoe asajë yo'oyë. ²⁵Jaje pa'iquëta'are, co'aye yo'oquë cato, jare i co'aye yo'ose'eje pa'ye sa'i cuañoja'quë api. Jaje pa'ina, Maija'quëre cato peoji iquëse'ere de'oye yo'ocas'i cayeje.

4 ¹Mëсарujë ëjaohua'i, ma'tëmоре mëсарu yo'ose'e cаja'quëre mëсарu Èjaëre pare paye sëte jare cuasajë mëсарute necaicohua'ire de'oye nuñerepa yo'ojë'ë.

²Sëtasicohua'ipi pa'ijë si'anëpi Maija'quëre sejë de'oji cajë ite pëpajë pa'ijë'ë. ³Cui'ne yëquëreje secacaijë'ë, mai Èjaëpi i coca quëaja'a sa'ro hui'yocaijaquëre, yahuesi cocare Cristo ayere cajë quëaja'quëre, ja cocare yë'ë quëaquë pa'i do'ire tseа cuаñosiquë pa'iquë. ⁴Sejë'ë, cui'ne yë'ë i coca quëa maca tiñarepa asaye quëa ja'ñere.

⁵Sehuoma'cohua'i ja're pa'ini ñare pajë pa'ijë'ë, si'anë de'oyese'e yo'ojë. ⁶Jaje pa'ina, mëсарu coca cayepi saija'iñeje pa'ye de'oyerepa pa'ijaquë cui'ne iohua'i seni asañu'u cajë señere. Pai ñapere de'oyerepa quëajë sehuocaicohua'i pa'ijë'ë.

Pëpa Tëjiye

⁷Yëquë oiquërepa Tíquico nuñerepa Maija'quë do'iquëpi, yë'ë ja're de'oyerepa mai Èjaë co'amaña necaiquëpi, mëсарute yë'ë yo'oquë pa'iyе quëaja'quë api. ⁸Jaje pa'ina, mëсарute yëquë pa'iyе quëaquë cui'ne Maija'quëre jerepa yëjë quëaja'quëni mëсарu quë'rona jëjo saoyë. ⁹Cui'ne i ja're con'i saiji, yëquë oiquërepa, nuñe pa'iquërepa, Maija'quë do'iquë Onésimoje mëсарu aquëje. Jaohua'ipi quëaja'cohua'i a'ë, iño tëto saijë pa'iyе.

¹⁰Aristarcopi yë'ë ja're tseа cuаñosiquë pa'iquëpi mëсарute pëpa saoji, cui'ne Marcosje pëpaji, Bernabé mamaëje. Jaëpi mëсарu quë'rona saiquë

pa'ito de'oye pëpani ñacaijë'ë, ite. ¹¹Jesús yequë mami Justo hue'equëje pëpaji, mësarute. Icohua'i a'ë, judío paì acohua'ipi sehuosicohua'ipi, Maija'quë cuañe te'te ayere yë'ë ja're nesicohua'i, jaohua'ipi yë'ëre sihua ëaye necaisicohua'i a'ë. ¹²Epafrasjë mësarute pëpaji, mai Èjaë Jesucristore necaiquëpi. Jaë cato mësaruru aquë api. Jaje pa'ina, mësaruni cuasaquë si'anëpi Maija'quëre secacaiji, mësarupi ocue pa'i macarepa pa'ijë Maija'quëna mësaruru pa'iyere isicohua'ire papi i yëyere yo'ojajë caquë. ¹³Yë'ëpi ñaquë a'ë, Epafras mësarute, cui'ne Laodicea pa'icohua'ire cui'ne Hierápolis pa'icohua'ire ai cuasaquë Maija'quëre seì pa'ina, ñaquë. ¹⁴Cui'ne Lucas yë'ë oiquë paìre jujuquëpi cui'ne Demaspi conì mësarute pëpayë.

¹⁵Laodicea pa'icohua'ire, Maija'quë do'ijëre pëpacaijë'ë, cui'ne Ninfasreje pëpacaijë'ë, io hu'ëna sehuosicohua'i tsi'sisicohua'ireje pëpacaijë'ë.

¹⁶Mësarupi iye toya ja'o ña tëjini jëjo saojë'ë, Laodicea sehuosicohua'ina, jaohua'ijë ñaja'cohua'ire. Cui'ne mësarupi ñajë'ë, Laodiceapi yë'ë toya daose'e mësaruru quë'ro ti'acquëna. ¹⁷Ñeje Arquipore cajë'ë: “Më'ëre mai Èjaë necaijaquë caquë cuañe nëose'ere de'oyerepa yo'ojë'ë.”

¹⁸Yë'ë Pablopì pëpaquë iye toya e'que yë'ë jëtë carapëpi toyayë, huañeyema'pë pa'ijë'ë, yë'ë cosiquëpi pa'iyë. Maija'quë oi ñacaiyepi mësaruni pa'ijaquë.